

AL CONSEYERU DE XUSTICIA, SEGURIDÁ PÚBLICA Y RELACIONES ESTERIORES DEL PRINCIPÁU D'ASTURIES

D./D^a (...), con DNI númberu (...), no so condición de Presidente del Aconceyamientu de Xuristes pol Asturianu (AXA), asitiáu a efeutos de notificaciones nel séptimu pisu, del númberu 22, cai Pérez de la Sala, d'Uviéu, preséntase y DIZ:

L'Asociación que presido ñació cola finalidá de contribuyir al desaniciu de les torgues que se-y ponen davezu al emplegu de la llingua asturiana n'actividá profesional de los xuristes y, siendo asina, que la Conseyería de la que vusté ye cabezaleru, vien espublizando delles convocatories nes que s'impón, pa poder presentáse, l'emplegu de modelos de solicitú escritos namás en castellán, torgando a los usuarios, pente ellos los miembros de l'asociación que represento, la posibilidá d'exercitar un drechu que-yos reconoz l'artículu 4 de la Llei 1/98, de 23 de marzu, d'usu y promoción del bable/asturianu, en relación col artículu 36.2 de la Llei 30/92, de 26 de payares, de Réxime Xurídicu de les Alministraciones Públiques y del Procedimientu Alministrativu Común, los artículos 4 y 10.1.21 del Estatutu d'Autonomía d'Asturies y el Plan pa la Normalización social del asturianu, afirmación qu'afiten los exemplos darréu:

- Resolución de 7 d'avientu de 2005 (BOPA 30-12-2005), ufiertando sovenciones a comunidaes asturianas nel exterior. Na base 1.4 desíxese presentar la solicitú "conforme al modelu normalizado anexo I" que contién siete impresos (solicitú, ficha d'acreedores, declaración responsable, ficha d'actividaes, ficha d'inversión, ficha de xustificaión y autorización) toos ellos presentaos namás en castellán.
- Resolución de 28 de marzu de 2006 (BOPA 15-4-2006) ufiertando sovenciones del Institutu Asturianu d'Amparamientu de Riesgos Profesionales. Nel numberal 1 de la base sétima impónse que "las solicitudes se ajustarán al modelu que se reproduce en el Anexo I" onde s'inxeren seis impresos (solicitú, tres declaraciones responsables, ficha d'acreedores y fueya resume d'inversiones).
- Resolución de 4 d'abril de 2006 (BOPA 15-4-2006), ufiertando sovenciones del Institutu Asturianu d'Amparamientu de Riesgos Profesionales. Nel numberal 2 de la base sétima impónse que "las solicitudes se ajustarán al modelu que se reproduce en el Anexo I" onde s'inxeren seis impresos (solicitú, tres declaraciones responsables, ficha d'acreedores y fueya resume d'inversiones).

Ye polo que-y

ENCAMIENTO: Que dea les órdenes afayadices pa que nes venideres convocatories de sovenciones o cualquier otru llamáu, nel que se imponga l'usu d'un modelu de solicitú normalizáu, s'incluya, xunto col castellán, otru redautáu en llingua asturiana, col envís de que l'alministráu pueda escoyer el que más-y preste y exercitar asina'l drechu que tien reconocíu a dirixise a l'Alministración nuna u otra llingua.

Ye xusto.

N'Uviéu, a (...)